

四庫全書

史部

欽定四庫全書

史部

名臣經濟錄卷四十

詳校官檢討臣德生

編修臣裴謙覆勘

總校官知縣臣楊懋珩

校對官中書臣葉蘭

膳錄監生臣王廷璧

欽定四庫全書

名臣經濟錄卷四十

明 黃訓 編

兵部

職方中之上

余肅敏公奏議序

楊廷和

肅敏余公之卒于是三十又三年矣其嗣孫南京錦衣
指揮承恩取其奏議彙次成帙以類相從分為六卷若
巡撫若本兵若總督各二卷并附錄凡百二十八篇諸

孫翰林編修承勛又為之正其謬譌亟以請于工部尚書李公士修刻梓以傳尚書蓋公從子婿也公為一代名臣正不詭俗廉不近名其功業在朝廷惠澤在天下者夫人皆知之至其規畫之周詳奏請之委曲非稽之奏議則或者未必一一悉其本末今去公既久而奏議始行於世是固有待於後之賢子孫也初公之卒其子錦衣指揮寘具公事行屬予為狀以請銘於太史氏其所述不能十之三四時予方從事史局得摘公前後奏

牘及往日所聞於公者書之丘文莊公見之謂是足以盡公之槩予意猶以為未足今取奏議讀之果然公嘗語人曰人臣事君當隨事盡力凡有建樹即近且小亦須為百年之計又曰大臣謀國遇有大利害當以身任之慎勿養交市恩為遠怨自全之地其城延綏時怨謗紛如公不恤執之不易卒以成功人至今利之且頌公之德不衰因言以求其志因奏以考其績蓋無一不相酬者信乎公之為一代名臣予生也晚於公無能為役

而公最愛予公往年丁家艱歸取藏書分遺鄉人之職文字者特以大明律諸司職掌畀予曰此可為異日用公之知我深矣獨愧老且無成無以為公報耳虞雍公嘗以鄉里前輩文獻無傳為後生之責予在閣中欲檢范景仁張德遠二公奏議錄之以傳而未及公固二公之流也斯集之傳予得而序之亦可以有辭於鄉人矣

軍務事

余子俊

該中軍都督府等衙門公文各將推舉將材官員職名

開報兵部臣等議得將官凡在內者皆荷聖明簡用在
外者多出撫按會保今五軍營坐營官缺尚要會官推
舉以為將官預選之用今查得成化九年本部會官所
舉將材選用將盡若不先事再行會保不無急於進取
者奔競成風恥於自顯者愈致埋沒合無行移兩京五
府六部都察院通政司大理寺翰林院科道并在外巡
撫巡按二司官員各舉所知不拘侯伯都督見任帶俸
都指揮但係存心愛人謀勇可取者每人訪保一二員

各用公文明開職銜略節脚色見管某事堪任主將偏將緣由通送本部方會在京各官評議如果所保相應別無異同就行列名上塵御覽仍付本部行令照舊管理原委之事候在外各邊將官有缺臨期奏請委用除侯伯都督總兵已重不須別議若都指揮堪任主將擬陞五府堂上官署職指揮堪任偏將擬陞都司堂上官署聽以示寵異以便行移向後果有戰功仍授舊職陞倘遇一時恩例不在實授之例前項署職皆係流官其

餘名器權以應變不至太吝經以守常不至太濫若急
無將官之缺中間有堪補京營坐營把總即為補用使
彼施其已能勉其未至若有守候果久輒為改節者不
再擬奏委用及或所舉不公事發連坐舉主如此縱是
未盡得才終是公道有在題准已經通行推舉去後今
該前因臣等會官議得舉到將材官員有曾被推薦三
四次一二次者目前所用大率類此但恐舉主一時聞
見不真所舉欠當合無行令照舊修其本等職業候有

主將偏將等項員缺臨期再為詢訪具奏定奪

嚴捕盜賊事

余子俊

職方清吏司案呈京城內外例有監察御史并錦衣衛堂上官督同五城兵馬司并錦衣衛分定城方校謹嚴夜禁及迤南北直隸近京地方官路三處每年冬春三箇月每五里冷鋪內派撥火夫住歇專令晝夜防護往來官吏諸色人等經行各路又差監察御史并錦衣衛官各一員帶領旗校前去督理防盜之法已為周密奈

何近來京城內外多有官民之家被其明火持刃劫殺
人財直至房屋近京地方往來人等常被披甲響馬阻
截道路若不申明舊例嚴加緝捕不無各事因循貽患
不小奏抄到部臣等切惟京師乃宸居所在四方萬國
所歸人煙輳集買賣繁華實有一等不務生理各處逃
往軍匠囚徒心腹相結三五成羣為非作歹人號喇虎
迨至家業蕩盡却乃賭博扶牌下棋打雙陸踢氣毬贏
者得財仍恣所欲輸者喪氣袖手無為遂至飢寒迫切

發起盜心往往京師肆行劫掠防微杜漸誠不可緩乞
勅五府六部六科各差有力量屬職官共五十五員內
給事中五員會同錦衣衛堂上官并巡城監察御史督
行五城兵馬司順天府委官通將城裏城外不分內外
官民排門不越一家取勘果有容留賭博不務生理來
歷不明軍匠囚徒等項許於各官處出首係民者送戶
部係軍者送兵部係匠者送工部迤發原管官司收候
無籍貫者送五城兵馬司監候事畢另議定奪以後再

有逃來者查係發遣之數果曾原犯死罪遇蒙恩例得免仍送原問衙門擬以死罪隣佑窩家今次并以後占悛隱蔽不舉俱與犯人同罪各官就行審編火夫除例該優免本身戶下二丁及止優免本身及官員優免本身一門外其餘大小人家不拘幾丁盡行編為火夫輪流坐鋪每夜務勾一十五名併力捕盜務在得獲不獲者巡城御史叅奏責戒隣佑不行救護者就行送問獲賊之日要問出窩家不服審編及審編不出者果係應

請旨者具實叅奏餘人就行送問其火夫文冊各官將稿付與兵馬司類造合用書寫之人行移國子監換取應撥雜差監生五十名分投書寫合用紙劄筆墨本部行令順天府支給官錢買辦送用乞勅禮部查例禁約官民人等本等衣服靴帽等項不許僭分過侈以足財用以省奸盜其迤南北直隸三路軍衛有司照舊設立火夫防護道路及禁約往來人等早宿明行不許中賊奸計如果遇賊勢不能敵星馳通報京營差去把總官

員撲捕毋得隱匿再乞聖旨榜文將前項弭盜崇儉事由該載於內昭示臣民以為遵守各官此外再有所見何者為致盜之弊何者為弭盜之方俱要條奏以候

災異陳言事

余子俊

切照去年以來陝西山西河南大旱饑民相食并正旦災異迭見星變有聲臣等條陳數事請自聖裁

一自古遇災必汰冗官照得在京各衙門文職官員已有諸司職掌額設等數近年以來額外添設數多及

傳奉陞授大小帶俸官員并寫經寫書等項冠帶食糧儒士匠官通計有二千餘員名其俸糧皂隸等項俱取辦於民不可勝數伏覲正統四年勅諭為因水災照永樂年間事例將各衙門多餘官員放回聽用方今百姓饑荒糧運艱難比之於昔災異有甚合無通行各衙門照諸司職掌額設官員存留辦事多餘管事并傳奉大小帶俸冗官及食糧儒士照例悉送吏部寄名放回原籍候本衙門有缺挨次查取任用其

匠官除精通藝業者量為存留若老弱殘疾藝業不通者一體裁革

以上吏部言事

一天下司府州縣稅比先年間歲徵過於歲用幾倍所以存留本處起運兩京及各邊倉庫常有贏餘不聞告急近年以來宗支益盛官爵益多災傷益重供奉上用不足京軍布花不足外夷賞賜表裏不足官待厨料不足此等大端率仰給於內庫京官俸糧折色不足京民賑濟不足倉糧邊方軍餉本色不足此等

急務皆取辦於京倉他如淮安徐州德州臨清四處
水次倉糧年例應該漕運官軍支運七十萬石以足
京儲四百萬石之數及兩京水路亦藉此以備非常
已是三年無有支運只得加重免納即今內庫金銀
錢鈔絹布等項所積之數不為甚多京倉料豆止勾
一年之上支用在外官軍俸月等糧并布花之類多
有一年半年全無況山東河南宗支奏稱缺食流民
住無定所且稅糧本色歲徵僅勾歲用所剩不多其

內外百官俸糧官軍俸糧軍士布花之類勢難減支
若不及早計慮臨期率難求濟伏望皇上留心崇儉
凡倉庫錢糧除上用及額設官員俸糧并功賞之外
非祖宗朝旨輕用者一切愛惜如此則國用可足久
安長治重在於此各處鹽運司提舉司歲辦鹽課我
朝十分慎重非邊儲缺乏歲饑救荒等項重事不輕
開中其興販私鹽雖皇親國戚有犯亦不輕貸近年
以來多被權貴等項人員任情奏討以致利有所歸

凡遇開中無人報納誤事不小自今以始務須專一
存留在官以備供邊救荒等項之用但有恃恩奏討
者許戶部指實行科道官一體糾舉治以重罪若係
內外官員臨期發落仍以罷職緣由開奏定奪在京
不係額設官員止支食米一石

一在京各倉內官非正統年間舊有者取回

以上戶部
言事

一大慈恩寺大能仁寺大隆善護國寺三處番僧俱有
廩給下程館夫等供應竊惟祖宗時因其來朝留之

京師加以館穀所以風示番夷使知朝廷之意圖靖
地方而已然先年法王不過一員佛子國師數亦不
多易於供應見今三處番僧不下千員法王已有七
人國師禪師無慮數十況法王佛子大國師例給金
印其用度擬於王者中間多有軍民因見番僧可以
躲避差徭各令子弟從學番教非惟夏變於夷其實
冒濫糧賞合無將三寺番僧選差給事中御史各一
員查勘果係邊夷的於何年月日來貢留京住坐有

情愿回還原籍者所司照例發遣有係中國軍民投託者許其自首回俗敢有不行首告者或體訪得出或被入告發定發邊遠衛分克軍如此則詐冒少革而供應少省

一淨身人已有處死明禁因見前項淨身者俱得收用遂各倣倣若不嚴加懲治誠恐將來無有紀極照得各處王府缺少內使煩瀆聖聽合無將前項克軍為民脫逃來京及新淨身每日赴部告擾乞勅司禮監

量撥各王府使用者惟復本部審其原係克軍為民者徑送各該衙門仍押發原衛原籍官司責令收管着役如有逃脫赴部告收者照例發遣本部仍將原衛原籍經該官吏叅問重罪其新淨身者俱照例發邊衛克軍今後敢有淨身者送去法司照依先次聖旨榜例問斷庶使人知警懼不致有傷天地和氣

禮部言事

一軍職必有擒斬功次方陞一級今查得成化元年以

以上

來諸色人等傳奉欽陞軍職八百有餘每員月支俸糧一石歲支絹布季支銀兩不等其指揮都指揮又有民僉皂隸辦納柴薪銀兩所廢無筭此實弊政之大者合無將此等官員除勲戚蔭叙軍功并額設員數不動外其餘令冠帶閒住候有員缺該部具奏銓補內係匠藝緊要不可缺者月支糧一石照舊供事今後非因軍功陳乞軍職伏乞聖明留意裁處庶使名器崇重少息奔競之風

一各處鎮守監倉守備等項內外官員除邊情緊急去處不動外其餘腹裏地面別無重大事情及不係正統年間原有之數合無查照取回

一在外鎮守分守等官於所在去處僉設皂隸等項名色合無悉令巡撫巡按官員查發寧家以後再不許朦朧僉報其在京文武四品以上官成化二十一年皂隸停止免僉

一查得軍京營提督內臣軍伴一百名掌營內臣與總

兵官各六十名坐營官十五名把總官六名各處鎮
守内外官各三十六名分守内外官各二十六名守
備内外官各二十六名俱係成化十四年以前節次
奏准非祖宗舊制近年以來各項官員日漸增添營
衛軍丁日漸消耗官多軍少惟日不足况每軍一名
年支米一十二石布二疋姑以軍一百名言之每年
支米一千二百石布二百疋而總為一官軍伴之需
其於人情事體實為太過合無今後量為遞減京營

提督內臣與管營內臣及總兵官軍伴各二十名坐
營官六名把總官二名各處鎮守內外官各十二名
分守內外官各八名守備內外官各四名庶官不缺
人跟用軍得以克操備

以上兵部言事

一錢糧出納當有其度且以寶石一事言之舊例凡興
販者俱發邊遠克軍寶石入官今在京嗜利之徒輕
視國典大肆奸貪賤價收買應禁寶石巧立美名作
一切奇玩之器其價正值百兩者或闕銀千兩值千

兩者或領銀萬兩此皆市井無用之物而盜府庫有
用之財伏望陛下凡一應寶石等項悉皆屏棄不令
眩耳目而役心志且府庫所積多歸於販賣寶石之
家今欲置之於法則事已既往不可勝追合無嚴明
禁令今後如有仍前販賣及作玩好器物者事發賣
主工匠俱照舊例發遣充軍如此則國用不費而奇
巧可息

一邊方強寇黠謀狡計難以輕測聲東擊西當預為備

近來邊將遇警張大聲勢擅請禁兵且京軍先期而去則費食糧草待報而行又緩不濟事切照各處沿邊俱有總兵鎮守等官設法勦捕今不專責其成功而輒從其告急遂為發兵騷擾地方虛耗糧草偶爾遇敵則擒斬多屬於邊軍而功次盡歸於權要合無行令大同宣府鎮守總兵巡撫等官各將所管官旗軍人從公揀選精壯平昔慣戰之人立為隊伍如或數少就於官員旗軍之家募選精銳舍餘輾成萬數

時加操練一遇聲息止令本處將官調遣見領軍馬相機勦殺如果敵勢衆大量力難支方許議奏命將其在邊官軍亦宜重加優恤有功一體陞賞如或各邊將帥玩寇失機必依常律誅戮無赦如此則賞罰明信而將士用命

一刑加有罪法貴得中且如兩法司錦衣衛鎮撫司鞫問罪囚察其原詞測其虛實依招定罪一遵常律但人真偽不一狡黠多端雖貌稽而審言豈能盡得其情

實間有一二稱訴冤枉者所司為因事有成案詞無
滲漏難以全信其枉及又有奏奉欽依止是依招擬
罪者故深冤未雪良民受誣合無今後法司凡遇一
應稱冤調問及奏送擬罪人犯情允當者俱照原招
議擬如果冤枉并情有可疑者亦與辨理具奏發落
毋拘成案其干碍原問官員悉置之不問不許妄加
叅究庶刑獄得平而人無冤抑

一朝廷設官分職皆有定設總兵鎮守本為地方近來

政務不加多而官職日增地方本無事而鎮守濫設
蓋生一事則有一事之害添一官則增一官之費其
間有等鎮守等官朦朧請勅許令四品五品以下官
員徑自拿問緣五品以上官員律該奏請今許拿問
非惟有違舊制況其欲自調問實欲陽張威權陰受
私賂為弊尤甚臣等又伏觀天順八年正月內詔書
一款浙江江西福建陝西臨清鎮守內外官員詔書
到日即便回京其各處鎮守內官正統年間原有者

照舊鎮守原無者即便回京不許稽延欽此欽遵伏望
皇上仍依前詔將各處鎮守等官酌量地方緩急量
為去留其應留仍舊鎮守者務令守分行事安靖地
方所有原請勅書即便奏繳如此則舊制不違而民
患可息

以上刑部言事

一查得先年設立直隸太平府湖廣荊州府浙江杭州
府三處抽分廠抽分木植等料專為成就光祿寺供
應器皿清江衛河二提舉司打造糧船以省百姓派

辦之苦近年以來南北兩京監局不察原設抽分之
意往往差官前去各廠坐守印烙起取日用供給沿
途拽運軍民勞擾不可勝言合無行移兩京監局如
遇文書到日即便轉行差去內官起程回京原取木
植等項除已運外其未運者存留在廠堆垛苦蓋本
廠差人看守造冊繳報倘後缺用另行定奪

以上工部言事

一江南人民部運白糧等糧赴內外衙門交收遠涉江
湖辛苦萬狀及至到京各該衙門官員刁蹬作難勒

要錢物所欲既遂方與收糧其收糧之時一石止准五六斗上納者有止准三四斗上納者吞聲飲氣莫敢誰何上納不敷加倍揭債完納債主到家官司不准重徵只得傾家蕩產鬻妻賣子以償之興言及此實切矜憐今後江南人民部糧到京赴內外衙門上納除原委部官及御史監收去處外其無委官去處合無委官一員到彼監收照例一尖一平不許多收侵虐人民

一每年恭遇節旦各處總兵副叅等官俱進貢馬疋中間賢智者自行出辦其不才者借此為名以一科十尅減軍糧甚至有將在官馬疋竊取應用者及夾帶私自馬疋二三十疋赴京供給人情買賣非惟沿途槩支糧草逼迫官司及至到京又費內帑之財給與賞賜無益於上有損於下合無行令各處總兵等官今後各處恭遇節旦止許照例進表不必進貢馬疋作弊害人

以上都察院言事

一各處軍民人等為因家鄉戶婚田土鬪毆等項小事官府剖斷不明不得已赴京伸訴本無別情奈被在京刁潑書寫之徒及鄉里辦事為事等項無藉官吏往往兜攬在家貪取財物百般教唆妄稱原來本狀情輕難以施行愚民無知聽其哄誘妄將鄉里京官并殷實大戶駕捏虛詞牽扯在內欺誑朝廷及至差官勘問實少虛多其差去勘問官員有存心公正識達大體者事得明白良善無冤其中有偏向避嫌不

能擔當者往往妄加叅語致事誣枉者難保必無縱
有事得明白其家屬親隣被其牽連在官經旬累月
破家蕩產者有之累死人命不敢聲言者有之又有
誣告無干人命因而掘墓檢屍傷害平人骸骨者有
之似此刁風實傷和氣乞勅法司嚴加問理除奏告
得實奏請聖斷其虛誣不實務要追拏教唆書寫之
人究問明白從重發落如此則良善不被凌辱衙門
不致混擾刁風歛息無辜得以申冤

通政司言事

一近年以來內外問刑衙門遇有囚犯不論情之輕重
事之大小在內則五城兵馬司等衙門在外則行府
衛州縣屬等衙門委官體勘以致貪鄙官吏交通賄
賂互相容隱以曲為直以是為非耽延日久淹禁罪
囚有一二年不完者有三五年不結者中間干連無
辜之人累死於獄者不可勝記不無有傷和氣召致
災異及致勘報原問衙門亦不分曲直是非照依原
來結保問擬罪名所以人多稱冤事無杜絕合無今

後除人命強盜重情應該檢驗及田土應該踏勘者
照舊檢驗踏勘外其餘一應詞訟止許行提緊關人
犯作急親自問斷果要干証之人亦就行拘面審省
令知罪不許一槩監禁行勘庶獄無淹禁而人免冤
抑 大理寺言事

緊急聲息事 余子俊

本部會同京營太子太傅英國公張懋等議得京營一
等二等精銳官軍合當定為三路聽征中路一萬員名

預備為大同宣府之援東路五千員名為遼東永平密雲等處之援西路五千員名為偏頭關延綏等處之援每二十五百員名定委團營坐營不拘侯伯一員用心操候其正馬馱馬三萬疋先儘團營之數不敷者三大營轉撥一應軍器大器旗號軍裝之類俱要先期整點齊備但調即行凡行軍監督總兵等官臨期奏請簡命各邊原委將官并所領軍馬並如前擬一體加意操候前項所擬在邊在京將官并所領軍馬此就平時而處

臨時果有變態如東路緊急至其西路河尚未凍又可往東策應之類難以拘泥及行戶部於臨期命將之日將處見在糧草一處一處開報將官以便分兵駐劄具題奉聖旨是欽此續該遼東鎮守太監等官韋郎等奏稱傳報壯兵尋殺三衛要往天朝地方上過等因該本部官欽奉聖旨兵部看了來說欽此本部看得原定東路聽征軍馬五千議得合於內摘撥馬隊三千選坐營官一員管領作急起程於沿途糧草多積去處且操且牧

至山海關即止候遼東守臣具奏請兵前項軍馬一面
過關應援會勦本部一面請命主將添調軍馬前去調
度以成大功具題奉聖旨是官軍且不必差着劉恒每
整搦人馬待報起程恁部裏便行文與韋郎等好生隄
備欽此近該太監等官韋郎等奏稱壯兵追殺三衛侵
犯開原地方砍傷守墩官軍等因該本部官欽奉聖旨
兵部便會總兵每看了來說欽此本部會同京營太子
太保保國公朱永等看得壯兵犯我開原名雖尋殺朵

顏等三衛兵丁其實撤我藩籬虐我邊人問罪之師義
所當舉但彼處守臣止言堅壁固守相機截殺應否請
調天兵略無一言及之固是遼東地窄此賊難於久住
萬一被其蹂踐豈不有損國威事急至此難拘前議伏
乞聖明合無將團營坐營都督同知馮昇署都督僉事
馬俊命充游擊或叅將名目先行請勅分領馬隊官軍五
千員名正馱馬七千五百匹一面促其作急起程如賊
尚在此正罪人斯得之時今去將官與彼處將官務要

平心易氣國爾忘家協謀合兵共圖殄滅若機有可乘
毋假持重以圖自全若事有未宜毋事輕率以墮奸計
所差官員即便星馳回奏另行上請命將出師兼程往
彼總制行事其山海關西抵黃花鎮一帶山勢雖險隘
口多北人譎詐聲東寇西不可不慮前項地方戰守之
間步隊可用或命都督僉事李俊署都督僉事楊五分
領團營步隊官軍六十員名領勅前去分布隘口有警
一體會合彼處守臣和同戰守若以兵分各該隘口前

項都督名位過重未可零碎徧管合無止選都指揮二員領勅前去本部與戶工二部各差官前去沿途井所在整理糧草車輛柴薪等項具題奉聖旨是迤北敵兵既在邊尋殺朵顏三衛難保不入境侵犯着都督馮昇馬俊充游擊將軍領兵去與彼處將官協同戰守山海關迤西只着都指揮二員領兵去協守都寫勅與他欽此欽遵外今該前因案呈到部看得巡撫遼東贊理軍務右僉都御史王宗彞所奏三衛夷人躲避北兵俱在

開原廣寧一帶倚仗中國以圖存生見在軍馬數少分布不周又兼遼東連歲雨災今年霜旱等項糧草蓄積甚是難為奏要文武大臣科道言官從長計議或加添人馬勦殺或止是本處官軍相機戰守一節此等邊患朝廷未嘗一日忘備或降勅或令所司行文已至再三今當警急至此方有前項議奏事理京營聽征軍馬兼程往援尚慮不及伏乞聖明合無再於團營添調馬隊五千員名正馱馬七十五百疋及簡命內臣一員監督

軍務兼管神鎗文職大臣一員提督軍務武職大臣一員掛印充總兵官又二員充叅將統領前項軍馬作急起程到彼會合先去游擊將軍軍馬總制鎮守巡撫等官相機戰守重大機務悉聽監督總兵等官便宜而行本部并都察院各差屬官一員隨軍紀功此外本部與戶工二部各差官沿途整理糧草車輛脚力人夫槽餼鍋甕柴薪等項聽候軍馬經過應赴至於將在軍門全賴糧草繼足再令戶部多為區畫軍前糧草其濟大事

仍照先行事理將見有糧草開報監督等官以便分布
軍馬支給其宣府大同兩路若前敵殺退必往彼處偷
生亦乞聖明留意候命下之日本部照例請給監督總
兵叅將并紀功官制勅付賚前去成化十六年九月十
八日太子太保兵部尚書余等具題奉聖旨是如今北
兵在遼東邊上尋殺朶顏三衛恐來入寇便着太監汪
直監督軍務保國公朱永掛印充總兵官威寧伯兼左
都御史王越提督軍務太監傅德管領神鎗白瑜李俊

克左右叅將莊鑑馬俊克游擊將軍統領官軍一萬員
名去彼會合征勦但恐北兵復回大同迤西等處侵犯
邊民着太監劉恒監督軍務定西侯蔣琬掛印克總兵
官都御史孫洪叅贊軍務太監張善管領神鎗白金克
叅將楊玉克游擊將軍統領軍馬一萬員名到彼會合
相機截殺官軍各賞銀二兩還着都督馮昇劉能各領
步隊官軍三千員名山海關迤西直抵居庸關協同彼
處戰守每人賞銀一兩着戶部差的當官各一員先去

整理糧草都不許遲悞各寫制勅與他欽此

陳言邊務事

王崇之

巡按山東監察御史王崇之奏所據脩武備以嚴內治足糧食以養官軍禁采取以杜邊患措糧儲以資急用俱係別部掌行事理擬合通行為此除外合行開坐移咨貴部煩為查照定奪施行

一足食以養官軍洪惟聖朝愛養臣民官有常祿軍有月糧此外又有折俸鈔貫冬衣布花思至渥矣遼東

阻山隔海官軍俸鈔布花皆由此給山東河南十一
衛自山海關陸路運到河南十四衛自登州海船運
到兩得利便然河西常勾給散河東拖欠數多者蓋
以陸路無虞海運廢弛也查得舊制造有海船一十
二隻官吏奉職依期運到雖全伍軍士皆得飽煖近
年以來船隻損壞者無人脩理鈔布拖欠者不肯補
還至成化十三年全無一隻到來海運不通官軍絕
望祖宗制度廢弛盡矣以故軍士凍餒流離缺伍者

多官員剝軍自養廢職者衆信乎其然也如驛遞鹽
鐵所軍俱無月糧止靠賞賜土官達官間有半俸又
係無子人數專賴俸給又無守臺巡哨晝夜在邊尤
為寒苦近因各處災傷荷蒙皇上憫念元元遣使發
倉賑濟所以固邦本重民命安地方也今邊諸預備
少積別無賑濟官軍合得糧賞尚不可得不無有孤
恩典查得自成化十二年以前共拖欠官軍俸賞鈔
六百一十萬三千一百七十錠布七十七萬二千六

百餘疋綿花二十八萬二千一百餘斤先該巡撫巡按官累次奏乞令本布政司起倩車輛運送及暫量價值折銀補還戶部議得陸運艱難節行本司查勘定奪造船僱運補解去後但彼處官員視為泛常略不留意夫衣食切於人身不可一日有缺今遲以數歲不能補給致此處有飢寒之苦彼處積無用之地陸路既稱難來海運見今無船則窮邊之官軍何所仰賴哉臣聞遼東舊時收成糧食頗賤商賈販賣易

換有無尚不免於飢寒今兵荒相仍商賈少通無物
易換使軍士啼飢號寒羣生嗟怨以此飢寒之人不
惟難驅於鋒鏑之下亦恐生意外之慮如蒙伏望皇
上俯念邊方重地憐憫軍士飢寒乞勅該部從長計
議奏請定奪合無不為常例將前項拖欠鈔布等項
行令山東布政司官存留在彼就作俸給查有見在
銀兩照數折筭解送或令布按二司分巡分守官員
公同估計量為便易銀兩委官解送前來以救邊方

一時之急仍乞將今歲布花鈔貫另為處置或暫折收輕費銀兩運來支給候造有船隻之日照舊海運如此則邊軍得目前之濟免飢寒之苦實為便益

一措糧儲以資急用臣聞食者民之天不可一日缺也故洪範八政食貨為先子貢問政孔子告以足食為首民生最重邊方尤急所以戰勝攻取守固皆賴於此聖朝垂意邊儲因遼東屯糧不足發銀糴買召商上納欽命巡撫官以總督之布按二司官以分管之

宜倉廩充實緩急足用也柰在前官員職任重大者
多好逸惡勞官職卑微者惟畏勢貪利甚有通同作
弊夤緣為奸官豪勢要之家乘機逐利撒放糠粃穀
豆糴買腐爛倉糧官銀多歸於富家錢糧多報於紙
上近因積弊多端特命給事中御史等官查盤辨驗
奸弊敗露倉官為民克軍巡撫管糧等官查提問罪
一清積弊邊軍稱快但刑罰雖加而事勢無及粗腐
虛闕於貧軍未蒙實惠折追拖欠於富商不肯還官

閑地腐爛相積邊境急缺糧儲如前屯等處倉糧不及半年之用海錦等衛有十年之積鰲雲等堡無一月之支今遼陽城中每銀一兩止糴米二石五斗前項堡分每官價銀一兩作米一石或八斗尚少人上納近因邊情緊急該巡撫總理糧儲官不得已恐缺軍餉會議於定遼金復等處十一衛軍餘輸運動調一萬餘人往迴一二千里每米一石顧腳盤費多者要銀七八錢少者亦不下五六錢河東之地遠近騷

然各官雖用心催儻但山澗險阻車輛不通止是牛
畜馱負力疲財殫卒難畢集事勢至此在前管理官
員尤為可恨欲減米數糴買恐虧損官銀欲增腳錢
與人恐庫藏缺乏即今又傳報聲息不絕設若大軍屯
駐日久轉運艱難逼迫緊急使軍餘逃竄山林疲餓
累死不惟重傷人命亦且大悞邊儲以後河開農興
尤難為用伏望皇上垂念邊儲重惜民困乞勅該部從
長計議措置急用之方奏請定奪行移巡撫總理糧

儲官員相度邊情緩急斟量道路遠近聽其隨宜增減米數腳錢多方措置以濟急用以恤人難其各倉拖欠折罰虧闕糧數行令布按二司管糧官躬詣各處上緊杖追先儘犯人財產變賣上納或令照依時價折納銀布入官另為處置以便目前支給俱先定與限期完報今後整理糧儲務要斟酌地方險易緩急查算見在有無多寡隨宜召納轉運庶不臨期有悞仍令布按二司管糧官員不時往來督察若有奸弊

就便叅拿不許在家久住若有似前延住三月之上
及已委接管畏避不來未曾得代先期回去者照例
住俸一年其分巡分守滿日亦照例將追問過囚數
糧儲事件開報轉呈巡撫等官處稽考勤怠若任內
怠慢誤事以致糧儲軍務不完及以後經該糧儲盤
有粗腐虧折等項重加叅問則邊儲目今不致缺乏
軍餘免於流亡巡歷既勤奸弊少革實為便益
以上
二事

咨戶部

一禁採取以杜邊患臣訪得遼陽山東土人少種田土專一採取人參榛松圍獵野獸為生數年以來多被本等上司及衛所官員指稱進貢人參等項或撒放布疋或給與銀兩便令部屬官舍於各寨百般逼迫科擾土人不勝其苦近時因見境內人參榛松缺少不堪又多私役附近軍餘出境採取販賣以規厚利常被敵人虜殺互相隱匿不報各處又有等軍餘土人不畏法度潛將鹽米包裹刀箭甲葉黑夜於牆下

空野去處與夷人易換貂鼠參松等物透泄事情啓
惹邊釁多由於此及各衛所官員又指以採打影木
買辦皮張為由差派餘丁不下五六百名通同委官
人等將殷實之人受錢賣放累及貧窮况採取亦難
查得每年進用影木止該十箱人參三百斤狐狸皮
張暫時買辦不多衛所官員却乃多科擾人目今前
項出產地方被賊搶擄殘破室廬空廢田畝荒涼見
在人口驚疑走入腹裏不能存活正宜厚恤伏望皇

上憫念邊方多事人不聊生將前項供應人參影木
及買辦皮張暫且寬免以紓民力以革擾害待後邊
患稍寧之日行令照舊採辦仍乞勅該部轉行本處
鎮守巡撫等官通行所屬出榜嚴加禁約及督令地方
墩空巡守人員晝夜加謹巡察今後如有私役及縱
容軍餘出境採取參松榛果等物及將刀箭甲葉與
夷人交易致生邊釁者許被役及知見人等徑赴巡
撫巡按官處指實首告正犯旗軍人等合無量為枷

號滿日與空臺巡哨甲軍俱照依律例問擬發落私
役官員并地方該管軍職一體叅奏拿問庶官軍知
所警懼下人免得疲勞亦杜邊患之一事也

以上咨
禮部

一脩武備以嚴內治臣聞禦邊疆之道守備為本城池
器械守備之具也將帥士卒守備之人也遼東為東
方重鎮各城有守備等官有屯宿軍士城池修理之
料軍國造作之需各有軍餘造辦既有其具又有其
人宜乎軍威振揚武備脩舉也柰何邊官中間廉謹

者少貪惰者多不脩兵備不恤士卒軍需物料多營於私室練操人力皆疲於私役甚至侵盜賣放之弊不可勝言所以城池欠脩器械不備士馬疲弊紀律廢弛脩理操練有名無實凡遇巡撫巡按等官點視指稱脩理反又科害軍缺則顧人頂替器械多那借應點惟務遮掩遂為得計前此之弊在在有之如遼陽一方大鎮也有六衛官軍有四千馬步有都司以統之有將官以臨之臣嘗一一點視如城上鋪舍多

無門窻塚口間用土坯灰刷四月之間操軍十日一
隊之中嘗少數人馬軍可以調用步卒疲弊不堪明
甲可以禦敵青甲不能遮體軍馬器械大率類此推
究其故輒稱邊方多事未暇脩理公差數多卒難齊
備大巡如此小巡可知平居如此遇警可知近該建
州海西賊人侵犯地方虜殺人畜已將副總兵等官
韓斌等失機誤事情罪叅奏外今前項賊人方命不
朝累報聲息壯敵大衆逼近我邊窺伺日久倘卒然

有警邊備如此可為寒心但積弊日甚久無稽考難以一一叅究往日廢弛固不可救目今修整不可不急如蒙乞勅該部計議奏請定奪合無行移本處鎮守總兵巡撫等官嚴督所屬及時脩理如法操練厚恤士卒謹慎烽堠及將見操不堪兵甲查照舊例奏請兌換堅完器械替出不堪之數官為脩理既不勞軍置辦亦足遇警克敵仍令各衛今後除軍器有例每季查盤外如鹽鐵木植磚灰等料俱資國軍重務

每季各要將收除實數開報巡撫巡按等官以備稽考仍委布按二司官員查盤若有短少就將經該官員叅以侵欺之罪其巡撫等官所至處所亦要不時點閘如城池器械等項不完者將衛所官員就加懲治立限完報都指揮以上官住俸催督完日照舊支給操軍數少查有役占者照依欽奉勅諭京營事例奏請照數降級甚者罷職克軍干碍總兵副叅等官一體叅究如此則法令嚴明人知警懼緩急得以濟

用奸弊可以少革邊務不至於大壞矣

以上咨工部

為地方事

張鵬

職方清吏司案呈照得京師迤北宣府大同等處迤東直抵遼東迤西直抵甘肅各邊各關自成化十九年大同地方有事以來雖經節次奏行隄備北寇及欽命太子少保戶部尚書兼都察院左副都御史余子俊前往宣府大同總督軍務太監張善監督軍務定西侯蔣琬充總兵官整兵待報啓行緣今大同宣府該余子俊奏

調京軍二萬見在脩理邊備及調集各處軍馬防護脩邊工程雖未就緒軍威頗已振揚正恐北敵威拉克實及其小王子率領部落錫錫等窺伺宣府大同一帶有備無隙可入不東寇遼東必西寇甘肅理合預防及照京畿與彼接境地方去歲少雪今春少雨天時亢旱二麥無收民食不足盜賊必生又恐河南湖廣等處地方大率類此切惟荊州襄陽二府雖屬湖廣當南北水陸要衝接連河南陝西各省境界本處地廣山深可以起

食所以各處饑民往往流移至此即今青黃不接之際重以天旱無收所慮各處饑窘之民或寇攘草竊或流移嘯聚亦合先時預備案呈到部叅照三邊隄備事情除大同宣府外朔州等處已該叅將楊玉領軍前去按伏及宣府鴈門關永平密雲等處見該游擊將軍白瑜李俊安順伯薛瑄東寧伯焦俊操兵聽調偏頭關地方已該余子俊調兵按兵按伏延綏寧夏陝西腹裏已該本部奏行各該守臣各行嚴謹隄備去後所據遼東甘

肅二處合無再行各該鎮守總兵巡撫等官查照原令
事理轉行副叅游擊等官提督所屬晝夜用心瞭望上
下協力隄防一遇有警互相傳報從宜戰守勿以文移
頻數略不加意致悞地方仍行順天等府及直隸保定
等處各該巡撫官各查照本管地方軍民休戚何如有
司積蓄何如各宜用心撫理如有盜賊生發行令各該
守備巡捕等官設法禁捕毋致疎虞荆襄地方近年雖
設有湖廣行都司鄖陽府衛等衙門事多草創未足倚

賴合行分守湖廣行都司等處太監韋貴提督撫治鄖陽等處地方右僉都御史王濬通行所屬其湖廣河南陝西各處巡撫都御史各行附近荆襄等處分守分巡撫民等官一體撫安人民禁捕盜賊如發糧賑給調軍勦捕之類應便宜者便宜處置應奏請者具奏施行務期弭患未然地方安妥成化二十年五月初二日本部尚書張具題奉聖旨是文書鋪馬裏賫去不要遲了鄖陽等處事情關係尤重着王濬每用心撫治不許怠忽

欽此

為敵情事

馬文升

職方清吏司案呈奉本部送於內府抄出鎮守薊州永平山海關等處內官監太監羅能題准總兵官署都督僉事李銘手本准巡撫右副都御史彭韶手本備兵部咨開臣等題據提督大喜峰口等關把總指揮潘清呈有泰寧衛都督托克托博囉等差使臣額森台等賫執番文奏稱番我們靠着邊牆住坐營盤丹口收放我的奴

婢逃走來說他們歸去的人大軍馬九月間來搶又有
愛滿王出哨拏住的人問他九月間上馬聽得這言語
專差使臣額森台徐阿爾古裕平章特穆爾知院阿魯
岱千戶托特千戶隨來博囉等前來朝廷前進馬叩頭
及審得徐阿爾古裕即徐安稱說年六十二歲原籍鳳陽
府舊城住係御用監裏廠撒花作所鎮撫徐旺男有父
正統六年故安于正統十四年隨駕迤北征進八月十
五日被巴延特穆爾平章部下的人巴圖爾拏住朝廷

遇見說是我的銀匠交與巴延特穆爾後安與同袁彬
哈名李成劉潑兒等伏侍聖駕回朝又交與額森太師
恐我走了聖旨分付徐安你要走了我到家把你全家
殺了隨後聖旨分付你久後回來陞你大官職不久復
被巴延特穆爾部下的人巴圖爾搶去隨住二十年後
連家小走在泰寧衛都督托克托博囉部下隨住一十八
年及說九月間迤北敵人要搶三衛遼東一帶等因會
同議得夷人額森台等來不及時及看得賚來番文印

信篆文有偽况所報夷情別無緊關欲便照例阻回緣數內徐安所說原係漢人先被迤北敵人搶去隨住二十年後走在秦寧衛又住十八年一向不曾到關今却賫執不明番文前來報事中間恐有隱藏別項情由難以憑信除將各夷拘留在關撫待聽候將原來番文封進乞勅該部計議合無將額森台與徐安等六名連馬起送赴京譯審定奪便益具題奉聖旨兵部知道欽此欽遵隨於兵科抄譯出秦寧衛都督托克托博囉等蒙

古奏文一道到部叅照臣等題稱泰寧衛頭目差使臣
額森台等六名帶馬六疋賫執番文一紙來邊報事進
貢除將各夷拘留在關奏來定奪一節切緣徐安原係
在京人匠自正統十四年被北人搶去經今三十八年
一向不曾近邊報事今一旦同各夷前來進貢中間恐
有別項情由及看得譯出番文大約與原奏相同來貢
既非其時據例合當阻回但數內徐安久住北地必能
悉其事情而本人所言似有欲回之意合無不違常例

行令臣等將各夷起送來京譚審北人事情緣是處置
報事夷人事理本部官奏奉聖旨是欽此欽遵備咨手
本准此行據大喜峰口關指揮使李伸將拘留在關夷
人額森台等六名連馬呈送前來合當起送開坐與總
兵官李銘都御史彭韶各具本該本部官俱欽奉聖旨
兵部知道欽此欽遵又該錦衣衛等衙門帶俸署指揮
使等官楊銘題臣等審得泰寧衛都督托克托博囉等差
來報事夷人額森台等并平章徐安等六名說稱成化

二十年有布拉克衛頭目托克托罕差平章奇塔特等七名
賫迤壯衛喇特克實克太師鉄牌一面到泰寧福餘兩衛與
頭目每說衛喇特差使臣八人到我每布拉克衛住下頭
目托克托罕轉差我每賫衛喇特鐵牌來與你每說有衛喇特
差來的人說着你每差人到衛喇特克實克處有話說
後有泰寧福餘兩衛差額森台等十一人到布拉克衛
聽得衛喇特營盤遠了數內兵丁歐德等八人回衛有額
森台托特徐安三人一同衛喇特原來使臣八人到地名

庫森托輝見了衛喇特克實克每說你每回去時與三
衛頭目每說在先原與我每衛喇特和好行走你每如今
不要去投順迤壯小王子每有小王子每常去搶殺你
每三衛人又與我每衛喇特不和又去漢人邊上做賊我
每衛喇特要差人往大明皇帝前進貢被小王子每阻住
路道不通不得差人去今有番字文書一紙你每賫去
朝廷前奏又說去年三月內有衛喇特克實克每差人
馬搶殺小王子部下大烏梁海三營人馬克實克太師又

說到今年冬間我每動人馬去搶殺小王子每我每還
差人到你三衛轉差人奏得朝廷知道你每三衛并布
拉克衛收拾人馬我每併力去搶殺小王子每額森台
等差去衛喇特今年三月內回衛又說有泰寧衛兵丁塔
喇齊被小王子部下兵丁搶去住過二年今年六月內
走回到衛說稱聽得小王子每九月間收割田禾時動
人馬不知往漢人邊上搶去不知來搶我每三衛當有
都督托克托博囉差三十人哨探小王子每拏住迤北兵

丁一人與走回的人托爾楚所說情相同因此泰寧衛都督托克托博囉等差我每來奏得朝廷知道又說三衛夷人常去小王子每處討搶去的人口往來走行以後夷情不知徐安又說我原係御用監銀匠正統十四年被迤北額森部下的人搶去在額森家住過額森自夥裏仇殺後到泰寧衛住過今差額森台并徐安等來報事討陞賞及據徐安告說我家原京東邊勾欄衛衛住有兄徐寬徐敏姪男徐達今要與兄徐寬等相見徐安

見有番字奏文一道理合隨身封進據審得此緣是夷情具本該各官奏奉聖旨兵部知道欽此欽遵又於兵科抄出譯衛喇特克實克等蒙古字奏文一道皇帝洪福前衛喇特克實克為頭知院蒙克等奏天的氣候緊急間往來使臣不能行走今我每欲要差使臣去途中有迤壯小王子兵丁每阻隔這等達子每朝廷邊上作歹我每處也作歹今年三月內有我每的哨馬去將迤壯大烏梁海的人搶了三營今我每這十二月要動人

馬尋小王子去我每欲要調諾延三衛六千人馬來助我每今有泰寧衛額森台王等三人來到我每處我就與文書着這三人奏去了怎生恩賜聖旨知道該部官欽奉聖旨兵部便看了來說欽此欽遵通抄送司查照原行太監羅能等公文相同除馬匹審據伴送舍人供稱隨本送御馬交收內一疋薊州倒死取有所在官司文憑送禮部該司執照及查得先該鎮守甘肅太監覃禮等題稱成化二十二年准分守肅州右叅將都督僉

事李俊手本譯據哈密衛左都督哈尚番文今有逸北
大衛喇特克實克死了部落將他兄弟阿實克齊扶做太
師又有克實克之弟阿里古多阿克王與阿實克齊不和領
右哨一萬人馬來進哈密地方住坐等因具奏抄出本
部已經具題外今該前因克實克又訛稱格實克案呈到
部叅照泰寧衛報事夷人額森台并徐安等說稱成化
二十年布拉克衛差人賫執衛喇特克實克鉄牌一面
到我三衛要差人到衛喇特說話有泰寧衛差額森台等

三人到見克實克說著三衛不要投順小王子我衛喇特往要天朝進貢被小王子阻路不通今有番文你賫去奏又說今年冬間我每動人馬去尋殺小王子還差人到你每三衛轉差人奏得朝廷知道你每并布拉克衛收拾人馬同我并力去擒殺小王子等語其額森台等又傳本衛兵丁被小王子部下搶去二年今年六月內走回說聽得小王子每九月間動人馬不知往漢人邊上搶去不知來擒三衛等情及譯得衛喇特克實克番文

却稱要于今年十二月內尋殺小王子要討三衛六千人馬來助他其餘情詞大約與額森台等所說相同臣等切緣迤北部落衛喇特為盛小王子次之而布拉克衛又次之今額森台等所賫克實克進番文既言要來尋殺小王子而哈尚又報克實克死其弟兄不和各領人馬已到哈密地方蓋額森台自前歲入衛喇特去歲冬間離彼今年三月回衛所賫番文想在克實克未死之先哈尚所傳係在今年六月之內克實克之死想已是實而

小王子要來搶掠似亦不虛但敵情譎詐難以盡信況其部落彼此猜疑互欲吞併未成合一之勢此誠中國之福然敵人為患自古而然趣逐水草標掠為生即目秋高馬肥正是馳騁之時侵犯之謀難保必無在我隄防之策不可不嚴及照額森台等情得聞北人事情遠來傳報誠意可嘉懷柔之禮亦不可不厚再照徐安原係內府匠役被虜年久今從各夷來貢歷陳前因既欲求討陞賞又願索見私親論法本當拘留不容回去又恐

有阻後來被虜之人向化之心况稱曾奉先帝遺命留
與敵人亦當量為處置合無鋪馬賫文與遼東山海宣
府大同延綏寧夏甘涼等處鎮守總兵等官各要查照
本部節次奏行事理嚴加整搦人馬措置芻糧修理城
池繕治甲兵務使以戰則勝以守則固仍差人不時遠
為哨探遇有緊急相機戰守仍行在京各營總兵官將
原選聽征人馬收拾停當遇有報到聲息就便起行戶
部計算各邊糧草有無勾用早為措備不致臨時缺乏

有悞軍機其額森六人行移禮部照常宴賞給與馬價之外再加一表裏以勞其來打發出關令通事省諭各夷歸語各衛大頭目各要堅守臣節毋二乃心既不許聽從小王子之哄誘亦不可輕信衛喇特調用凡有事情速來傳報朝廷待爾素亦不輕萬一謫詐不實為彼探聽自取滅亡悔無所及其徐安既欲要見伊親合無俯順其情容其兄弟親人與之相見仍令通事再審本人若就願留別乞恩典本部另行奏請定奪若欲仍回北

地顧其妻子亦宜量與職事伏乞聖明裁處俟後果能
仰慕聖恩懷戀桑梓携家來歸尤當優異緣是處置報
事夷人及節奉欽依兵部知道并兵部便看了來說事
理未敢擅便等因成化二十二年八月初七日本部尚
書馬具題奉聖旨是徐安待通事每再審了來說

照例改撥官軍備禦事

馬文升

職方清吏司案呈奉本部於兵科抄出太師兼太子太
保保國公朱永題先該兵部行文開中都留守司并山

東等都司摘撥官軍三千員名分爲春秋兩班俱遍周而復始又該本部行文先期一年預行定撥省諭領操官旗令其次年該班不必到營徑赴該鎮交班等因今照弘治六年秋班輪該河南都司摘撥官軍一千五百員名今止到六百五十三員名尚欠八百四十七員名若候完足撥去不無有悞彼處守禦臣等會同太監楊穆議得本部所擬前項官員不必到營徑赴該鎮備禦一節但三大營選出頭撥團營官軍上以拱衛宸居下

以預防征調即今各邊卽報聲息倘有警急未免動調
况今各處災傷官軍不能齊足赴操合無乞勅兵部計
議查照撥去神機營官軍守備紫荆等處事例行移五
軍營照數摘撥官軍輪流前去本鎮備禦存留團營官
軍專聽征調庶不兩相妨誤具本該官奏奉聖旨兵部
知道欽此欽遵抄出送司查得先該太子太傅安遠侯
柳溥奏稱景泰三年九月內差撥神機營官軍四千三
百五十一員名前去居庸紫荆等關口守備今半年已

滿乞將神機營原撥十營官軍照數摘撥前去替換具題奉景皇帝聖旨十營官軍本欲專一操練遇警調用若要差撥別處等項守備不如不選着總督總兵計議停當行欽此欽遵該本部會同太子太師武清侯石亨等議得十營官軍原係欽奉勅諭揀選頭撥精銳操習聽調之數已蒙聖斷明白臣等別無議擬欲行該府轉行該營令太子太傅安遠侯柳溥於本營存操官軍內更換其十營官軍人馬不許擅動開坐具題奉景皇帝

聖旨是欽此欽遵外及查得續該本部議得中都留守
司并山東都司撥去黃花鎮操守城堡荒涼以四處論
之已是不均其中都留守司獨撥秋班山東都司獨撥
春班以兩班論之又似不均既該軍人楊上三等合詞
具告合無行移團營自弘治五年為始先將河南都司
春班太寧都司秋班輪赴該鎮操守一年至次年却令太
寧都司春班河南都司秋班又令赴一年仍行中都留
守司并山東都司輪流赴鎮亦如此例大率四處每兩

年一輪兩班俱徧周而復始永為遵守具題奉聖旨是
欽此已經通行欽遵外又查得該戶部等衙門會議奏
准內一件該整飭薊州等處邊備兼巡撫順天等府右
副都御史唐珣奏稱原派黃花鎮春秋兩班官軍要照
京營限期徑赴黃花鎮交班該本部查處照得前項官
軍今後定撥省諭先擬事例兩年一輪先期一年預行
定撥省諭領操官旗不必到營徑赴該鎮交班敢有該
班來遲脫班不到及到班在逃等項悉照京營事例而

行又經通行欽遵去後今該前因案呈到部看得太子
太師保國公朱永等奏稱弘治六年黃花鎮秋班官軍
輪該河南都司摘撥一千五百員名前去備禦今止到
六百五十三員名數內尚欠八百四十七員名要乞查
照神機營官軍守備紫荆關等處事例行移五軍營照
數撥本鎮備禦一節照得京營軍馬永樂宣德等年在
五軍三千神機營三大營操練至景泰初年選出精壯
官軍立為十營操練專備征調天順初年仍散歸三大

營至成化年間為因各營軍馬號令不一卒遇邊方有警一時取撥不定恐致誤事因言者之議於各營內選取在京井外衛官軍共一十七萬總在一處分為十二營操備又命內外大臣提督名為團營凡遇各邊有警就便調遣前去不許別項差遣內以護衛宸居外以預防邊患居重馭輕強本弱枝其慮不為不逮其勢不為不重但今團營官軍事故等項不及一十二萬之數而五軍營欠少團營官軍四千餘名即今又無別項工役

或遇重大工程又於團營內借撥用工其黃花鎮防守
官軍原係長陵等四衛撥去為因離衛不遠率多在逃
又因閩實邊關大臣具奏暫於團營內撥去今本鎮秋
班官軍輪流該河南都司摘撥前去防守但河南地方
去今二歲水旱相仍官軍饑窘不能赴操以致團營數
少欲候到足撥去緣今正係防冬時月不無有悞本鎮
備禦若再於團營見在官軍撥去萬一邊方有警又恐
調遣不敷况團營官軍不宜別項差撥係奏准事例今

既該各官會奏前來若不權宜處置未免兩相妨悞合
無行移五軍營總兵等官於本營次撥官軍內照數先
行摘撥一千五百員名差人送至黃花鎮防守其弘治
七年仍預行中都留守司該春班山東都司該秋班各
定官軍一千五百員名不必赴京徑赴黃花鎮防守周
而復始二年滿日仍令河南并太寧都司照前輪流免
致撥亂團營官軍其五軍營該補團營之數陸續送如
此庶京營武備以修而邊關防禦不失緣係議處改撥

邊關備禦官軍及奉欽依兵部知道事理未敢擅便弘
治六年九月二十九日本部尚書馬等具題次日奉聖
旨是

題為任情方命妨悞邊機事

吳瀚

臣照得先年哈密城池被敵帥阿哈瑪特殘破虜去善巴
荷蒙皇上垂念哈密城池係我太宗文皇帝所立善巴
又係朝廷所封一則為西域之藩籬一則通諸番之貢
使不可輕棄簡命兵部左侍郎張海前軍都督府都督

同知緱謙委以腹心之託專以處置之權一時臣民莫不感激以為張海緱謙者必能上體聖心下急邊難展胸中之素蘊克復長城運掌上之奇謀收回故壘夫何一籌莫展百事無成乃裹緱糧徒棲遲於士馬未遺巾幘終貽笑於婦人因循歲月二年之間方纔奏稱阿哈瑪特遣人賫番文進貢就獻還哈密城池被虜善巴城池尚為伊蘭占據善巴猶留三角城意在邀求先前扣留夷使等因命下兵部該多官會議得此首變詐難信如

果將城池善巴獻還貢物許其赴京前留夷使打發出
關若不獻還將今夷使方物逐出原拘夷使仍前拘留
善巴失地喪身亦難再立城池屢經殘破亦難遽復節
該奉勅諭爾等宜令都勒噶布拉掌管哈密衛事與三種
夷人暫居苦峪其城垣壕塹營堡等項預為脩築完備
散處夷人給與口糧牛犂買辦彩段梭布量賞頭目以
結其心處置畢通將起送過夷人姓名日期并用過牛
具種糧數目造冊具奏回京欽此欽遵又該兵部奏稱

近聞敵率小王子人馬潛住賀蘭山後節入搶掠軍士十分艱難必須賑恤方保無虞先因多官會議將哈密寄住夷人盡數發遣苦峪居住及要將進貢夷人打發出關以絕西域貢路當此烽烟交警之時軍士罷困之際行此二事誠恐致有他變合無請勅張海緹謙從長計議等因節該奉勅諭爾等即會同鎮守太監傅德總兵官劉寧巡撫都御史馮續從公計議先行差委布按二司官員將被搶之家逐一查出中間果係十分艱難

者支給官庫錢糧量加賑恤務令得所毋致逃移及再
議前項哈密夷人并進貢夷使如是未曾出官即今敵
兵未退地方未寧應否照依會官議處事理照舊打發
出關或當暫且容其寄住候邊事頗寧之日另行發遣
務要籌畫計議停當通行奏來處置欽此欽遵豈期各
官以勅書為故紙視君命如浮雲不奉命而擅回既奉
勅而故抗先次勅書回至涼州衛接過後次勅書回至
真定府接過飄然長往不顧粗心大膽事屬故違且大

臣以身係國家安危况彼敵情不為不緊邊機不為不重使敵聞之寧不輕我中國抑恐各邊將官聞之不能不為之解體是而可忍孰不可忍伏望皇上乾綱獨斷將張海縱謙拿送法司明正其罪以為臣下方命悞事之戒緣張海等俱在京堂上官未敢擅便謹題請旨弘治七年十二月十九日題次日奉聖旨張海縱謙錦衣衛拿送鎮撫司問欽此

乞恩陳情絕嫌以全骨肉事

馬文升

職方清吏司案呈奉本部准禮部咨儀制清吏司案呈
奉本部送於內府抄出晉府寧化僖順王妃趙氏奏有
臣府僖順王存日於景泰成化年間因弟鎮國將軍美
珞爭襲王爵連年評奏不已美珞子即鍾毓與臣世仇
人所共知後鍾鈺襲爵其鍾毓等深懷不平專以報復
父仇為事陰謀反間無日不用其心况鍾鈺等年幼失
教瞋無知覺竟各墮伊計中以至上瀆天威下傾祖爵
迹鍾毓平日教鍾鈺作威服人致使上下離心後與鍾

鍼鍾鉅鍾銷無日不會議自為謀主各人不知是詐悉聽其發縱指示鍾鍼嫌於僭逼不敢興詞主使鍾銷乘機而發至有今日之變此山西闔省同一論也想其起謀之時惟復害鍾鉅貪圖臣軍所莊田豈意軍所莊田俱蒙調撥推原鍾鉅之罪是皆衆人醞釀而成臣今含恨鍾鉅及各將軍恨不得糜爛其肉而飲其血但念臣先王軍所莊田受之祖宗列聖傳之宗嗣以奉祀事於無窮所以不避鈇鉞之誅以為奇隱慮實非為奇隱為

臣先王祖考也伏蒙聖皇推罪人不孥之仁罰弗及嗣之義存留正軍一百名莊田三處與奇瀝管業抑非獨厚奇瀝厚臣先王祖考也臣非不欲上體聖心與宗族分享切惟鍾鈔得罪於朝廷故軍所莊田祿糧盡數革去其各將軍醞釀成鍾鈔之惡附會成鍾鈔之罪謀陷祖考之爵豈不得罪於其祖考哉况各人人役地畝初不奉朝廷明文特臣先王祖考一時親親之情今各將軍既得罪於祖考則祖考之遺惠其不應受也明矣臣伏

觀大明律內一款親屬相為容隱凡有告訐即同自首
免罪所以篤親親而厚風俗所謂律設大法理推人情
今鍾鎔為鍾鈔親弟鍾鈔之罪法固難容在國主晉王
所當舉在朝廷所當治臣以為斷非鍾鎔所當言亦非
各將軍所當謀害也忘親犯義其得罪於祖考豈不益
彰彰矣乎茲者伏蒙皇上念臣祖考量存其輩奪之餘
以延臣殘喘而各將軍不思王爵已被各人傾陷又復
假情飾詞肆為侵占忘祖考宗庶之分目竒慝為罪人

之子而欲贅拾罪人之人役莊田何其無恥之甚也觀
今鍾鈺犯罪觀各將軍奏詞竟無一人肯念親親扶持
之者各人之情可知臣復何甘仍與各人人役地畝及
照鍾鉅與鍾鎬同母兄弟為謀多出於鍾鉅鍾鉅鍾鎬
為鍾鈺親弟仇害如此其與竒瀝叔姪之情可知仰惟
皇上深居九重大臣位列廊廟與臣隔越千里據情而
論孰曰不宜倘能親聞面察未必不通行禁治昔莊公
養成叔段之惡而殺之呂祖謙曰叔段之惡日長而莊

公之惡與之俱長鍾鈔固當有罪醞釀而曲成者豈得無罪况各將軍越理妄為與鍾鈔誠為兄弟臣欲迹其顯著指實上聞又恐重增臣祖考地下之羞是臣又重得罪於臣祖考也所以飲痛吞聲欲言而止見今被鍾鈔奏討餘丁八名未幾而鍾鈔比例奏討切惟臣府各將軍三十餘員後封者不計其數援情比例人孰無詞以臣府革奪之餘安能周無窮之用且親王郡王各有定分大宗小宗各隨所尊臣觀目前大臣會議言郡王

不該使用軍以不出於祖訓今鍾鑑等奏討臣校尉餘丁
恐亦非祖訓舊例臣忠鍾鑑兄弟不知皆因此輩小人
誘引往來教唆離間骨肉致生今日仇嫌况鍾鑑為回
避仇嫌事已自行奏入晉府與臣府已無相干今若將
臣府校尉餘丁仍分撥各將軍使相往來必復引惹是
非小人懷奸無所不至其各莊田各人雖分一半中間
地土相連爭長競短必相訴訟將有不勝其方來之仇
矣別嫌遠疑以全親親莫若各役其役各有其有不惟

使役者專心則主者亦可以絕嫌疑而息爭端思臣莊田入官者六十餘頃軍餘入官者三千餘名况各將軍各有校尉儀從祿米已有定分倘蒙皇上念各將軍至親在所必恤乞將臣入官地內照各將軍今撥地畝量撥管業入官軍餘係各將軍舊役者量留使用庶使地土不相連而爭競之仇可絕人役不相往而是非之仇可絕則親親之恩庶可保全而骨肉之私庶可復得臣非得已自速罪戾以煩瀆天聽但鍾鈔實為各將軍同

謀祖爵實為各將軍共陷竇與各將軍誓不共天今
賜與竇滙莊田人役俱係臣累次奏准已奉勘合不許
各將軍侵占明文為照情實難甘若仍分與各將軍受
用又使之日相侵迫則爭訟仇訴必無了時臣聞骨肉
相殘古今大惡此等子孫恐非聖明宗室所宜有也臣
預先奏知倘不允臣奏章臣自備脚力率臣孫竇滙并
宮眷人等詣闕訴冤臣干冒天威下情不勝戰慄惶懼
之至等因奉聖旨該部看了來說欽此欽遵備咨送司

查得先該寧化僖順王妃趙氏節奏鍾鈔已蒙欽斷着
戴頭巾間住要將前項一所官軍仍留與嫡長孫奇隱掌
管等因該本部議擬具題奉聖旨是准留正軍一百名
改作校尉與本府使用欽此欽遵及查得續該寧化僖
順王妃趙氏奏稱鍾鈔已革爵嫡孫奇隱見奉欽依着
管府事要將本所正軍內揀擇一百名改作校尉與其
使用該本部議得前項軍所既已改調今所奏留之人
止是恭依欽賜原數情在可從事不為過合無仍行山

西鎮守巡撫等官依其所揀正軍一百名俱改作校尉
留與本府使用本戶餘丁一同隨住具題奉聖旨是張
聚等一百名准改作校尉與本府使用欽此欽遵又查得
該寧化僖順王妃趙氏奏已蒙朝廷存留庄田三處校
尉一百名以此感激具本陳謝但慮各將軍欺孫奇瀾
年幼莊田占種人役占用要乞降勅諭戒等因本部議
得除莊田行移戶部查照外合無轉行本府使知保守
并各將軍勿肆侵奪具題奉聖旨是欽此欽遵又查得

該護國將軍鍾毓奏稱祖撥地土已經戶部勘議歸與
管業其使用餘丁原係祖遺人數要乞查照巡撫都御
史楊澄回咨將寧化王府軍餘均平分撥該本部議得
既查有前項回咨其寧化王府校尉張聚等一百名連
餘丁共計一千一百二十四名况原撥餘丁楊名張七
十等止是八名地土既已半給人役似難獨吞合無將
前項餘丁八名俱仍留鍾毓使用具題奉聖旨是欽此
欽遵又查得該寧化僖順王第七子鎮國將軍鍾鉅奏

原蒙祖父撥與人役被鍾鉅累一槩革去缺人役使地
土已蒙欽依分撥人丁亦祖所遺要乞將奇瀝府下校
尉劉聚才等一十五名連各餘丁撥與跟用等因該本
部議得奏討正軍校尉奉有欽依難以分用所據奏稱
要將餘丁量撥跟用合行巡撫山西都御史會同鎮守
官員勘處停當明白具奏前來以憑上請定奪具題奉
聖旨是欽此欽遵已經備行山西鎮守巡撫等官通行
勘處去後今該前因案呈到部臣等看得寧化僖順王

妃趙氏所奏大槩以鍾鈔革爵嫡孫竒慝管理府事蒙
朝廷存留正軍一百名同餘丁俱與使用極知感激但
前被鍾毓奏討餘丁八名今鍾鉅又行比例奏討若仍
行分撥誠恐各將軍援例具奏爭無了時意在別嫌遠
疑以杜將來切惟朝廷皇子冊封為親王親王之子為
郡王郡王之子為鎮國將軍先前親王初封之時俱有
護衛而郡王只撥與校尉將軍止撥與儀從或親王篤
愛其子將護衛官軍奏准撥與郡王使用郡王篤念親

親將軍餘撥與諸子將軍役使此出一時私恩非祖宗
舊制今寧化王府一所官軍既已盡數改撥太原左衛
其一百改作校尉又係朝廷特恩存與寧化王府之數
不係先前全所官軍據法論理固難分撥若論祖王遺
愛先已撥與役使年久一旦革去人情不堪似可量撥
故前此鎮國將軍鍾鑑奏蒙撥與餘丁張七十等八名
意正如此續該將軍鍾鉅又奏討校尉劉聚才等一十
五名本部又經通行山西鎮巡等官從宜勘處未報今


僖順王妃趙氏正慮此舉若再分撥將來各將軍一定爭競不已事無了期以此懇情奏乞定奪固為有詞但查無勘報緣由難以上請定奪合無仍行山西鎮守巡撫巡按等官會同三司掌印官員作急將先次鎮國將軍鍾鉅并今次僖順王妃趙氏所奏事情從公併為查勘要見將軍鍾鉅於懿簡王存日曾無奉有祖王遺旨親筆手書并奏該何衙門勘合撥與軍餘若干名役使係寧化府見今存留正軍一百名改作校尉餘丁內何

人係是原撥人數惟復止是援例奏討別無前項執結緣先次撥與鍾鑑餘軍八名以其存有都察院勘合奉僖順王妃趙氏及鍾鉅親書手批為憑方纔撥與今鍾鉅所奏若不曾奉有祖懿簡王父僖順王遺旨親筆手書并該衙門奉行勘合為照俱不必輕易分撥以啓爭端前項事情務在勘查明白計處停當免致再行奏擾畢日將勘過緣由會奏前來以憑另議上請定奪再照寧化王一府宗室蕃衍細查前後各起奏詞內開僖順王

第七子除鍾鉶革爵鍾鉷等三位俱故外其鍾鎔鍾鉞
鍾鉅三位見存及查本府疎派將軍見在者三十餘員
後封者尚不計數今次鍾鉅既比依鍾鎔事例奏討前
項校尉其後來將軍豈不亦以鍾鉅為例奏討餘丁役
使此時若不通為定奪未免向後連章具奏紛爭不已
非惟煩擾朝廷抑且殘傷骨肉甚非盛世宗室美觀合
無行移山西鎮守巡撫巡按官員行令布政司轉行晉
府長史司啓王知會仍行寧化王府今後各鎮國輔國

將軍但不曾奉有祖父遺旨親筆手書并各該衙門分撥
與軍餘勘合見存為照俱不許妄行奏擾煩瀆聖聽仍
將原奏立案不行以後竒瀝襲封若情愿將今存留校
尉餘丁量撥與各將軍使用以厚本枝以篤親親不在
此例緣係議處王府奏乞定奪分撥校尉及奏欽依該
部看了來說事理未敢擅便弘治八年十二月十八日
太子少保本部尚書馬等具題奉聖旨寧化王府存留
正軍一百名係朝廷特恩今後各將軍不許奏討分撥

鍾鑑餘丁八名已撥與丁罷欽此



名臣經濟錄卷四十